

Q. D. B. V.

IVS  
AVGVSTI  
IN ITALIAM

publice edifferet,

PRAESIDE

CONRADOSAMVELE

SCHVRZFLEISCHIO,

PROF. PVBL.

THEOPHILVS AGRICOLA,

RATISBONENSIS,

*In Auditorio Maiori,*

AD D. APRIL.

*A. cl<sup>o</sup> l<sup>re</sup> XCVII.*

CVM PRIVILEGIO SEREN. EL. SAXON,

---

Disputatio II.

LIPSIÆ, Apud NICOLAVM SCIPIONEM.

cl<sup>o</sup> l<sup>re</sup> XCIIX.

24  
A V 2 V 2  
IN T A M A

COTTON  
CHAMBER

ALONG A 3 A 3  
COTTON

---

THE  
COTTON



I.

**R**egnum Italiae condiderunt Langobardi, quibus ob pertinaciam domitis, atque ob perfidiam debellatis, summa eius regni potestas ad Germanos delata est, sublato extinctoque regendi iure, quod Langobardici Reges usque ad Berengarii II. tempora habuerunt.

II. Ex quo enim Rex Italiae Berengarius II. se filiumque Adelbertum Ottoni magno, Germanorum Regi, permittit, regnumque ab eo clientelari titulo, et fide iurciurando obligata, suscepit, regni illius ratio vehementer mutata est, ut Rex non suo iure regeret, sed Ottonis magni concessu beneficioque regno praesset, eique ut domino, summam rerum adepto, iuxta cum filio Adelberto, deinceps teneretur. *Quod rationibus, auctoritatibus et exemplis confirmare licet ex Luitprando, illorum temporum aequali, Wittikindo Corbeiensi, Auctore supplementi Reginonis, et inter recentiores Carolo Sgonio de regno Italiae lib. IV. Quem in Germanicum sermonem convertit Georgius Nigrinus, et annotationes adiecit, sed quae gravitati scriptoris non respondent, omnino autem declarant, cum in Caesarea et regia Italiae iura aliquoties iniqum fuisse.*

III. Neque vero in hoc regno, ante Ottonem M. Regum arbitria valebant, sed procures sacri profanique, lapsis in Italia rebus, quod per desidium et *derelictionem* Francorum contigit, eam pepererunt sibi et confirmarunt auctoritatem, ut cum Regibus de immunitate privilegiisque servandis paciscerentur, qui perfidia Berengarii, promissa et pacta-

violantis offensi, ad unum omnes sese Ottoni M. subiecerunt. Haud obscure *auctor historiae Beneventanae* indicat, regni Langobardici proceres, priusquam Regi Berengario renunciarent obsequium, ei, nisi regno cederet, filiumque succedere sibi pateretur, denunciaſſe, *regnum extero Regi commiſſuros*, id est, translaturus et tradituros, quod aliquanto post evenit.

IV. Idcirco huius regni Ordines testati sunt, regnum hoc non esse in Regum patrimonio, et proceres a cura et confortio reipublicae non excludos, quippe eo loco habitos, ut non modo constituere et creare Reges, verum etiam, si leges regni violarent, auferre iis dignitatem, et adimere regnum possent. In quo convenit Sigonio cum scriptore historiae Beneventanae, quum tradit, summum regni urbisque Mediolanensis Antistitem, *de more concilium vocasse, atque ex omnium, qui frequentes convenerant, sententia regnum Berengario atque Adelberto abrogatum, ad eum (Ottonem M.) detulisse, ipsumque in aede D. Ambrosii urbana, magno apparatu caeremoniaque inunxisse, consecratumque ferrea (ex vulgi opinione) corona condecorasse. c. l. de regno Italiae.*

V. Sed deiectis deletisque Langobardorum Regibus, regnum illud auspicio Ottonis M. in patrimonium gentis, nationisque Germanicae redactum est, et mutato sic rerum statu, Optimates Langobardici iure constituendi Regis excidentunt. Quo novae potestatis regiae argumento Otto M. in tabulis A. DCCCCLXII. editis *regnum proprium* nominavit, propterea quod suis et Germanorum armis opibusque acquisivit, et pleno perpetuoque iure nationi Germanicae addixit, et aeterno foedere coniunxit, adeo ut nunquam deinceps ab Italis reperi, multo minus a Germanis, quorum sanguine partum est, ad aliam externamque nationem transferri, aut quovomodo abalienari queat.

VI. Quin idem, qui primus inter Germanos hoc regnum obtinuit, Otto Magnus, iam ante decretum a proceribus de transferendo factum, ius eo in regno habuit, postquam Berengarius, eiusque filius clade sua eo redacti fuerant, ut victori se permitterent, fidemque astringerent, et iureiurando interposito confirmarent. *VVitekindus annalium III. quem secutus est Sigonius, et scriptores etiam Germanicos evoluit.* Hac ergo lege pater et filius regnum ab Ottone receperunt, ut nomine huius beneficii, clientelare ei obsequium iurati profiterentur. Accidit postea, ut promissi tam sancti immemores, spreta iurisiurandi religione, Ottonis dignitatem laederent, cui in Italiam reverso obsistere non poterant, viribus et consilio destituti. Igitur Ottoni regnum vindicaturus, regni illius proceres, conventu habito, assensu sunt, regique declarato, fidem obstrinxerunt. Otto perfidiae et perduellionis poenas ab utrisque reperit, ob eamque causam regno multavit. His argumentis tota reigestae ratio continetur, iustitiaque Ottonianae animadversionis comprobatur.

VII. Quare non est, cur exquiramus, utrum Otto sibi, an Germaniae regnum istud acquisiverit, quando haud negari potest, maximum in eo acquirendo Ottonis fuisse momentum, quippe qui auspicio ductuque suo, nullum laborem periculumque recusans, neque opibus suis parcens, acquisivit, ut familiae, quoad superesset, ratio haberetur, nec tamen a Germania, cui summae fortitudinis fructus constabat, divelleretur. Nam dignatio *primi acquirentis* hoc merito exposcebat, ut non temere familia eius negligeretur, cui novum amplumque regnum, quod *Viridarium Imperii* dicitur, natio Germanica acceptum ferret. Quoniam vero hoc regnum virtute et impendio maiorum, viribusque adeo et opibus Germanorum acquisitum est, prorsus ita cum Germania coaluit, ut labente Ottonum familia, regnum illud nihilominus penes Germaniam esset,



esset, et Regis Italiae imponendi ius, regniqve in universum constituendi potestatem soli Germani haberent. Alioquin rebus meritisqve Ottonis Magni conveniebat, ut eius familia non deteriori conditione esset, quam Karolina, quae ante Reges Langobardicos et Germanos, etiam iure hereditario regnum Italiae tenebat.

VIII. Ceterum ab hoc tempore, quo Otto M. regnum Italiae suscepit, consensus procerum Italicorum non erat necessarius, nec modo non in eligendo Rege, sed etiam in constituendo regni statu negligebatur. Ottonis enim in eo regno successores, regia potestate, quam is fundavit, praefuerunt, et regni negotia libere moderati sunt, non expectatis procerum suffragiis, quae Germanis rerum potientibus, nullum ibi, ne in Comitibus quidem, pondus habuerunt. Hoc mover, ut ab eorum sententia discedam, qui existimant, *Ordinum in Italia consilium et consensum in Comitibus requisitum fuisse. Apud Io. Schultzerum, virum eximium, et iureconsultum accuratum, instit. I. Publ. l. XV. 4.* Nam Germani praeterquam quod suo iure, et suapte auctoritate Regem Italiae constituunt, proceres quoque Italicos Regi ab se constituto astringunt, legibusque in Germania latis complectuntur. Illud vero est insigne documentum iuris, quod Germania in regnum Italiae habet, eiqve Regem imponit, et leges praescribit, litesque Principum summo iudicio disceptatae decidit. Aliquid huius ostendunt formulae capitaque pactorum, cum Imperatore nuper electo conventorum, praesertim qua ad Sabaudiae et Mantuae, Mutinaeque Duces spectant, et vero ibi temperamentum potestatis speciatim declarant.

IX. Nihil vero impedit, quin Principes consilium dederint, et cum Regum suorum voluntate consenserint, dummodo in ea conditione manerent, ut latis legibus se subicerent, et leges quoque sine eorum consensu fierent, neque ipsorum dissen-

sensu decreta regia infirmarentur. Hoc enim iure usi sunt Ottones, eorumque successores, atque in repugnantes sibi ac resistentes, tanquam in perduelles, animadverterunt. Quae Regum potestas tam firma fuit, ut proceres quoque non tractuum suorum se dominos, sed nomine Regis ministros terrae se dicerent, et non tam clientes ac beneficiarios proceres, quam usufructuarios se agnoscerent et faterentur. Quod de Regulis Mediolanensibus, qui *Viccomites* appellati sunt, tradit *Albertus Argentinensis in Chronico ad A. MCCCLIV.*

X. Nondum ergo regia auctoritas in Italia, nedum in praecipua eius regione Mediolanensi, exoleverat, sed, constitutis passim Vicariis et *Potestatibus*, mandata Regum, etiam post magnum illud ac fatale interregnum, et Rudolphi Habsburgii tempora, in urbibus et provinciis curabantur. Sed Galeacii, annitentibus praecipue Luzelburgicis, opibus cummulati, in eam se extulerunt altitudinem, ut Imperatoribus, per quos creverunt et evecti sunt, formidolosi fierent, et potestate cum titulo aucta, imperante Venceslao, prope ad Italiae dominatum aspirarent. *Io. Nauclerus Chronograph. Vol. II. c. gener. 47. Theodoricus Niemius l. IV. c. 33. Memoris Unionis. Praeter hos scriptores Itali Villanius, Corius, Ripamontius, qui Galeaciorum consilia, artes, instrumenta, ambitionis et potentiae apernerunt. Addendus est Macchiavellus histor. Florentin. l. I. et l. III.*

XI. Vix altius repetendum est initium imperii civilis Italiae Principum, quod ratione quadam summo imperio respondet, et *territorii* nomine definitur. In quo redarguenda est Luzelburgicorum, Caroli IV. et Venceslai indulgentia, quod dandi et concedendi modum exceßerunt, Vicariis ducibusque hereditaria lege constitutis, contra primae acqvirentis sententiam, in regno iure belli parto, et in ea sigillatim provincia, quam Otto sibi iure proprio addixerat,

co-

eodemque titulo successoribus regendam tenendamque re-  
servarat. Quae causa fuit graviter conquerendi Niemio,  
non sine stomacho scribenti. *Venceslaus Rex patrizando*  
(patris prodigalitem imitando) *nobilissimam ac famosissimam*  
*provinciam Lombardiae* (vero et antiquo nomine Lango-  
bardiae) *quam ipse Otto magnus Augustus Viridarium imperii*  
*appellavit, et eidem Imperio singulariter incorporavit* (arctis-  
sime coniunxit) *ut per Imperatores, et Reges Romanos* (Reges  
Romanorum Romae, aut Romanae ditionis urbe non con-  
secratos) *qui essent pro tempore, iure proprietatis perpetuo*  
(nullo principe interposito, qui ius regendi clientelare, sum-  
moque Regis imperio devinctum habeat) *etiam quodammo-*  
*do separando ab imperio* (non divellendo, aut dissolvendo im-  
perii nexum, sed regimen duntaxat mutando, quod iure ma-  
gistratus antea Vicarii imperiales in Langobardia habuerunt,  
et concedendo ius beneficiarium, dominiumque utile con-  
stituendo) *in optimo foro vendidit tyranno*, nempe Ioanni  
Galeacio, qui praecipuas Italiae urbes, Veronam, Vicentiam,  
Patavium, Perusium, Assisium, Pisas, in potestatem suam re-  
degit, sublatoque *Bernaboe* patruo, ac devictis Scaligero et  
Carrario, totum Insubriae principatum in ditione habuit, at-  
que in Etruriam et Umbriam fines protulit, Mantuanumque  
sibi obnoxium reddidit, in eoque Imperatoris, quae Regis et  
domini, auctoritatem neglexit, atque ab officio patris et pa-  
truorum discessit. *Iosephus Ripamontius hist. Mediol. decad.*  
*III. lib. 3.*

XII. Haec Galeaciis via patuit, quae ad hereditarium  
Insubriae principatum pervenerunt, quorum casu, simul ut  
Ioannes Galeacius oblit, finitimi erecti, et exemplo incitati,  
praefecturas et vicarias dignitates cum perpetua, sed Regi-  
bus devincta, potestate commutarunt, nec praesides provin-  
ciarum, et magistratus, sed principes facti, comitesque erecti,  
et Mar-



et *Marchiones* appellati, hinc maiori potentia et auctoritate Duces renunciati, tum *Vicecomites* quoque ritu et pompa apud Italos insolente, cum nomine ducis, et iure quod ad posteros transit, creati, quorum primus in tantae possessionem auctoritatis inductus, et solenniter inauguratus est Ioannes Galeacius, misso eam ad rem Beneficio, qui Venceslai, summi Italiae Principis, beneficiariiue domini personam sustineret. *Ripamontius c. l. p. 257.* Vere igitur meritoque a Venceslao ducitur principium imperii civilis, in Italia constituti, at summo devincti, et a regio temperatione quadam dependentis. Quamquam alii a Carolo IV. arcessere malunt, qui *Vicecomitem* instituit Galeacium, et concessa hac dignitate, supra ceteros extulit per Italiam vicarios, sed eam potestatem, quae complexu suo omnia regionis iura, sub una et summa potestate continet, ac in *territorii* fines descripta, trito hodie vocabulo *superioritas* dicitur, demum Galeacii filio, Ioanni Galeacio, Venceslaus novo in Italia more est imperitus. Neque illis assentior, qui hoc exemplo ducti putant, ius illud, quod regionem potestate, regno devincta, completitur, ex Italia tractum fuisse in Germaniam, propterea, quod Germani huius possessionem dignitatis multo ante adepti sunt, et inde ab ultimis regni initiis, ius paciscendi cum Regibus sibi vindicarunt. Contra Italiae proceres Ottoni M. et successoribus eius subiecti, Germanis de se statuendi potestatem permissum, ex eoque tempore sui iuris esse desierunt.

XIII. Postea rebus, labente republica, turbatis, viribusque regnantium inclinatis, alii post alios potentiam sibi conflare, et maiora quaedam iura affectarunt sensim atque usurparunt, nec tamen simul et universe statim obtinuerunt; quaedam concessu Regum, quaedam patientia ipsorum compararunt, inprimis ad ius numi cudendi, atque ad vectiga-

lium exigendorum potestatem aspirare coeperunt. Idcirco Fridericus, Aenobarbi cognomine appellatus, instauravit dignitatem pristinam, et auctoritatem regiam, illustri Ottonum exemplo, confirmavit, reductis stabilitisque iuribus, quæ per temporum iniuriam neglecta, aut imminuta videbantur. Testis est locupletissimus *Radevicus*, in conventu publico iura regni vindicasse, procuresque iussis Friderici obtemperasse, et omnia, quaecunque ad se traxerant, reddidisse. *Lib. II. cap. 5. de gestis Frider. I.* Nihilo secius paruerunt urbes, et iudicio Regis acqvieverunt, speciatim Mediolanenses et Ligures apud *Gunsberium, Ligurini lib. II. X.* Otto *Sanblasianus in appendice Chronici Ottonis Frisingensis cap. XIV.* Ingenue is, quem paulo ante nominavi, *Radevicus*; *super iustitia regni* (Italici) *et de regalibus* (ducatuum, marchiarum, Comitatum, Consulatuum, item monetæ, teloniorum, vectigalium) *quæ longo iam tempore* (usurpata non usucapta) *seu temeritate pervadentium* (nullo concessionis regiae titulo habentium, et aliena invadentium) *seu neglectu Regum Imperio deperierant* (non penitus extincta, sed turbata bellis factionibusque Italia, vi doloque intercepta) *studiose differens* (deliberans et restitutionem flagitans) *cum nullam possent invenire defensionem excusationis* (causa ceciderunt, nec titulum docere potuerunt) *tam Episcopi, quam primates, et civitates uno ore, uno assensu, in manum Principis* (Imperatoris et Regis Italiae) *regalia reddidere*, exceptis duntaxat iis, qui donatione beneficioque Regum se, salvo summi imperii iure, tuebantur. *c. l.* Qua de causa Imperator legum peritos consuluit, auditisque eorum rationibus et sententiis, abalienata *regalia* postliminio et plene recepit, reditusque eo nomine debitos aerario addixit, et potestate regia Italiae negotia constituit, mandataque promulgavit. In tabulis equidem *praecepti imperialis* formula ante oculos observatur, quæ summum Regis imperi-  
um

um notat, quia Imperatores Augusti regio titulo Italiam habent, quamvis eo, salvis regni Italici iuribus, non utantur, more seculorum veterum, quae titulorum parciora erant, et in uno Imperatoris Augusti titulo, ut qui sanctitate et splendore omnes Regum titulos vinceret, acquiescebant; in iuribus autem privilegiisque *imperiali auctoritate* concedendis, regnum quoque exprimebant, et *imperiali beneficio, ac regni nomine regalia* possideri testabantur, *in tabulis passim, et apud Radevicum cit. loco.*

XIV. Verum dignitates illae eminentes, et iura, quae *regalium* appellatione iampridem curia insignivit, nondum ea tempestate universam ditionem complectebantur. Certis enim definitisque partibus constabant, neque ad eam maturitatem pervenerant, ut tantam potestatem absolverent, quantam quidem *territorii* nomine continetur. Clarum certumque huius rei documentum est, quod diu post Friderici excessum, Henricus Lucelburgicus, Imperator huius nominis VII. ius numi cudendi seorsim ab aliis iuribus concessit, quod scriptum reliquit *Conradus Pecorius, Spinulae*, inquit, *Marchionique Montisferrati cum alia dignationum genera, tum ius monetae cudendae tribuit, apud Vrsisium in vita Henrici VII.* Non hic ius, quod potestate *territorii* definitur, attributum est, nec dominium, aut iurisdictio per omne *territorium* patens concessa, propterea quod speciatim *ius monetae* indicatur, neque ultra fines, quibus *concessio* illa circumscribitur, proferri debet. *Dignationes* quoque non afferunt ius in *territorium*, sed ad munia et honores spectant, ab ea tamen potestate et *sublimitate*, quae *superioritas* dicitur, seunctos.

XV. Ducatus, *Marchiae*, Comitatus, non eo, quo postea, nexu proceribus astringebantur, sed vicaria quadam ac praefinita potestate regebantur, et Regum voluntate be-

neficioque, sine iure *territorii*, conferebantur, atque adeo sine *regalibus*, quæ *territorium* deponit et continet, possidebantur. Deinde cessavit hæc regendi ratio, et præfecturis in dominia versis, dignitates illæ cum *territoriis et regalibus* copulatae sunt, ac perpetuae fieri coeperunt. Nec tamen defuerunt, qui dominarum concupiscerent, et administratione abutentes, multa supra conditionem suam captarent. Ecelinus, quem Gvelficarum scriptores partium odio habent, antiquas Italiae urbes pro Imperatore rexit, nec alia, quam vicaria potestate functus est, atque ad curanda et conficienda Imperatoris mandata se astrinxit, cum apud eum de administrationis vitio deferretur. Tunc ait. *Mandata D. Imperatoris (Friderici II.) firma mente tenebo. Antonius Godus Chron. p. 47.* Quem alii tyrannum vocant, etiam pro iure Imperatoris regio bellum gesserit, defectionemque urbium acriter castigavit. *Monachus Paduanus Chron. lib. I. Nicolaus Smeregus Chron. p. 59. qui factioni Gvelficae student, quos incaute alii, maxime recentiores, et Muresus insuper metachronismum committens, sequuntur.* Erat quidem Ecelinus vehemens, et ulciscendo nimius, sed Imperatoris partes secutus, et Gvelfico nomini insensus pariter invisusque. Haud aliter cum Palavicino actum est, qui pari constantia Gvelfis, ac sociis eorum Atestinis resistit, nec modo nihil de regio Imperatoris iure detraxit, sed quoque summam eius in regno Italiae auctoritatem defendit, et ut Paduanus loquitur, *coepit Ecelini vestigia imitari, Chron. lib. II. fin.* Nec vero urbes factionibus turbatae, a regno se disiunxerunt, cum vicariis Regum imperiis, *salvo erga Reges vinculo*, obniterentur. Quod tempore Gvidonis Turriani evenit, contra quem Urbs Mediolanensis, excito e Germania Henrico VII. auxilium imploravit, eumque liberatorem et vindicem expetit, et accepit.



pit. *Calcibi Continuator Ripamontius decad. III. lib. I. p. 60.*

XVI. Habet adeo Italia unum Regem, et unum dominum, iudicemque summum, cuius imperium per universam patet Italiam, regni iure constitutam. Quo tenentur omnes Italiae Principes, et urbes a principum dominio exemptae eodem obligantur, atque ut *naturali domino* suo devinciuntur, iure nimirum per Ottonem M. fundato, perque Fridericum Aenobarbum solenniter instaurato, quod constante Italiae regno manet, et soluto clientelae nexu, remissoque huius nomine sacramento, nunquam solvitur, nec mutatur, argumentò perpetuae et indissolubilis, quae ex illo imperio oritur, obligationis. Hanc profitentur Legati Urbium, et summae Regum potestati se subiectas esse testantur. *Tui sumus, te dante provinciam, urbesque regimus: tibi pecunia et milite, ubi opus est, praesto sumus.* Hinc non modo Dominum appellant Caesarem, sed et *naturalem Dominum* agnoscunt, et *reditus, iustitiae administrationem, libertatem* (certam et circumscriptionem) *non indita* (quam naturalis subiectio respuit) *sed data* (concessa et donata) *non usurpata* (sine fraude et vitio quaesita) *sed a Caesaribus accepta iactamus*, id est, bono titulo, nec iure Imperii delibato, nos possidere gloriamur: *apud Antonium Posservinum, omnino haec recte ex Actis Friderici I. et Radevici historia colligentem, Gonzagae lib. II. p. 133.*

XVII. Quare nihil summo Regum imperio ademptum, est, ne tunc quidem, cum intestinis procerum dissidiis Italia laboraret. Rudolphus I. eam non ingressus est, quod rerum Germanicarum satagens, regnum illud per vicarios regebat, et consilio plus, quam armis pro illo tempore efficiebat. Albertus bello civili impeditus, cis Alpes substitit, et pristino in statu omnia reliquit, certe nullam regii imperii partem ven-

didit, aut abalienavit. Post utrumque Henricus VII. iure suo usus est, et auctoritate regia urbium controversias decedit, factiones compescuit, et urbibus rectores dedit, vicariosque instituit, Gvidonem Turrianum, dominatui inhiantem, ad privatam conditionem redegit, Matthaeum *Viccomitem* sibi obsequentem habuit, sed postea suspectum exilio multavit, eumque, conciliante *Garbiniatensi*, restituit, atque hoc deinde initium et gradus fuit ad potestatem vicaria maiorem, quam ea occasione Galeacii, salvo Regum iure, obtinuerunt. Adhuc supersunt *Imperatorum epistolae, ad Vicarios et urbes regni Italici perscriptae*, summi vim dominii comprobantes, ut vel harum documento purgetur Rudolphus, huius nominis primus, et prodigalitatis, quam recentiores nullo idoneo teste memorant, absolvatur. *Langobardia* propria, quae verum et vetus, imo praecipuum huius regni membrum est, Henricum Caesarem trans Alpes venientem libenter suscepit, et fide officioque cultum, in primario urbis Mediolanensis templo Regem inauguravit. *V. Corius, Vecerius, et Ripamontius*. Inde Apennini iuga transcendit, et emendato Langobardiae statu, urbes provinciales obiiit, et ius regium confirmavit. *Liguria*, quae a Varo fl. ad Macram patet, Henrico obediens fuit, huiusque caput Genua eum *principem dominumque* appellavit. *Apud Vecerium d. l.* Fateatur quidem *P. Bizarus*, urbem et universam Liguriam iurisiurandi sacramento se obstrinxisse Caesari, sed perperam tradit, primum hunc fuisse externum dominum, quem Regem et *naturalem* dominum, cuius in ditione et potestate erant, appellare debuisset, eo modo, quo aliae, et Regi obsequentes urbes, *Dominum nostrum*, summi regique dominii argumento appellant, *Hist. Genues. lib. V. p. 98.* Eodem iure, *Sardinia*, quae saepe suos mutavit dominos, et postremo ad Aragonios pervenit, Liguribus relicta, fiduciario nomine ab

Im-

Imperatore Alienobarbo concessa. *Vb. Folietta hist. Genuens. l. II.* Nec vero *Tusciam* neglexit, quam nobile Imperii membrum vocat *Petrus de Vincis l. V. ep. 126.* Ante alias *Tusciae* urbes, *Pisana* praepotens, et re navali florens, fidei inprimis suae, et religionis memor, *Regem accepit, dominumque* consalutavit, ut *Vecorius* affirmat. Reliqua *Etruriae* oppida, quae imperata non faciebant, officiumque deserebant, ut perduelles multavit, et bello persecutus est, Castellionem *Etruscum* armis subegit, *Corbonam Aretiumque* adventus sui fama terruit pariter ac inflexit, ut appropinquanti obviam irent, mandataque obedienter curarent. Iam *Florentiae*, expugnatæ arcibus et castellis proximis, imminebat, reversusque *Pisas*, severa in rebelles *Tuscos* edicta promulgabat, laud dubie executurus, si produxisset vitam. *Vecorius c. l. Tabulae apud Mussatum extant, in quibus Tuscia inter subditas imperii Romani provincias numeratur, lib. XIII. de gestis Henrici VII. Caesaris.*

XIIIX. Omnino res sacri imperii agitur, cuius iura servari par est, et, quum necessitas postulat, vi armisque defendi, hoc magis, quod Imperatores sua potestate res Italiae constituunt, dummodo nihil auferri et abalienari patiantur. Quo ex capite *Apulia* quoque Imperio obligata est, in cuius Regem Imperator lege perduellionis animadvertit, quod foedus ad suam et Imperii contumeliam pepigisset, *Tusciamque* Imperii provinciam, in factiones et studia partium distraxisset. Iure summae potestatis Imperator sententiam tulit, ac pronunciavit, *Robertum Apuliae Regem, ob laesam maiestatem Romani Imperii paterno regno, provincialique Comitatu excidisse.* *Vecorius in vita Henrici p. 72. Frisifianae editionis.* Ante hunc *Nicolaus Specialis*, illorum scriptor temporum, et quod caput rei est, *Neti* in *Sicilia* natus, de *Roberto* tradit, cum hostem imperii iudicatum, et causa cognita, criminis

atrocissimi damnatum. Hic autem (Henricus Imp.) *asserens Robertum Regem esse Vassallum Imperii, eum tanquam contumacem, atque suae imperiali coronationi apud eandem urbem (Romam) per Ioannem fratrem eius, et alios armata manu hostiliter, et multa effusione sanguinis obsistentem, pluresque civitates et terras (Etruriae, et aliquas Lombardiae, Florentiam, Senas, Lucam, Pistorium, Bononiam, Cremonam, Brixiam) ab imperio svasione multiplici revocantem, hostem reipublicae (Imperii) nominavit, et tanquam reum criminis laesae maiestatis Caesaris sententialiter (de consilii sententia, ut Vecerius) condemnavit, Rerum Sicularum l. VII. c. 1. Sententiam Pisis latam, in tertium decimum historiae librum retulit Albertinus Mussatus, p. 70. seq.* Non hic tantum perfidia et simplex delictum, sed maximum illud crimen, quod fidem simul et obsequium solvit, describitur, cuiusmodi est *laesae maiestatis*, quod non merus princeps beneficiarius, sed imperio subiectus committit. Duplicem hic personam sustinet Henricus, unam quia Imperator et Rex Italiae, alteram quia Rex transalpinus et Arelatenensis; illius enim ratione Apuliam et Calabriam, huius argumento Comitatum Provinciae Roberto abiudicavit, et utroque modo summam potestatem, quamvis ex diverso habendi iure, haud obscure ostendit.

XIX. Praeterea hunc Imperatorem *Sicilia* propria, quae trans fretum est, maximopere coluit, comiterque habuit, et munere dato, pecuniaque missa, ius agnovisse visa est, quod Henricus VI. Hohenstauffius connubio quaesitum, suo primuni auspicio ad Romanorum imperium adiunxit. *Legati*, inquit Vecerius, *a Rege Siciliae Friderico* (huius nominis II.) *mari deportati, donum aureorum millia viginti afferunt, foedus amicitiamque petentes.* Cuius foederis ea ratio fuit, ut praecipuam Imperatori dignitatem relinqueret, et maie-



maiestatis coniter conservandae fundamento niteretur. Hoc iure Imperator Regem bello navali praeposuit, et summum maris, quod Italiam alluit, praefectum constituit, ut Robertum perduellionis reum infestaret, et regno everteret, suo et imperii nomine ultor futurus. In hanc sententiam scribit auctor Siculus Specialis. *Friderico Regi, quod iam praefecerat Admirationum (Archithalassum) imperii, bellum Roberto Regi indicare, atque terram, quam tenebat, invadere imperiali, quod fungebatur, auctoritate mandavit.* Quae satis indicant, Fridericum adeo non oblitum esse pristini Imperatorum iuris, ut contra susciperet partes ab Imperatore sibi demandatas, et huius adeo auspicii praecesset classi, quod sane aequo foedere fieri non potuisset.

XX. Cum vero haec belli navalis praefectura ad mare inprimis Tyrrhenum et inferum spectaret, tum de Adriatico submonendum est, eius ratione Venetos Imperatorem adhuc reveritos videri; quorsum pertinet Veccrii testimonium hoc loco non praetermittendum. *Idem Episcopus (Geneventis, Imperatoris Henrici VII. cognatus) profectus Venetias, tributum pro vetere consuetudine postulavit. Appulso ingens honor habitus, adnumerataque in tiam Romanam talenta Veneta mille.* Quod documento sit, Imperatores summo dominio non tantum continentem regni Cisalpini, sed etiam *stagna Adriatica* et insulas eius nominis complecti voluisse, et ut in aliis Italiae civitatibus, sic Venetiis etiam ius sibi reservasse, cumque ob inaugurationem Caesaream expeditiones Romam susciperent, annonam et pecuniam flagitasse, ac in omnibus immunitatum et privilegiorum concessionibus atque confirmationibus sigillatim excepsisse *foedrum regale et consuetum*, quod nec ipse Sigonius, veritate victus diffiteri potuit ac dissimulare. Illud pro certo affirmandum est, Venetos ad haec usque tempora nihil in Continente Italiae sibi vindicasse, nec

C

dum

dum possedisse Continentis urbes, *Tarvisum, et Tarvisinam Marchiam, Patavium, Brixiam, Vicentiam, Veronam, Bergamum*, regno Italiae per vim subtractas, ac nulla iuris cessione, abalienatas. Quod de Henrico satis constat, cuius edictum *per universas et singulas Lombardiae ac Marchiae Tarvisinae civitates exiisse, confirmat Mussatus l.V.*

XXI. Ergo Italia omnis, ne maritima quidem excepta, a principio regni Karolini, et hoc sublato, ab initio Ottoniani, sub iure Imperii constituta est, cum parendi, et praestandi muneri, quod imperanti debetur, obligatione, per leges et consuetudinem inducta, quae tam firma est et stabilis, quam ipsa haec potestas, unde vis obligandi proficiscitur, perpetua est, et semper manet. Etenim hoc regnum novis Germaniae auspiciis coeptum, non ex Carolino derivatum, neque ex ruinis eius instauratum, et postliminio restitutum, neque cum familia regnante, ut apud secundae stirpis Francos erat, sed cum natione, quae nunquam tota interit, nexum, atque ex prima origine et contextu suo aestimatum, *originariae* Urbis libertati officit, nec sui plane iuris et arbitrii relinquit. Indicio huius rei sunt privilegia, quibus maiestas agnoscitur, ab Imperatoribus concessa, et obligatio curandi res, ad iter Caesareum necessarias, quae in annonae et pensione, transituque tuto praestando, consistebant, et redintegrata cum Lombardis ac Veneris pace, expressa Imperatoris stipulatione excipiebantur. Cuius formula confessionis extat *apud Sigonium de regno Italiae lib. XIV. p. 338.* Sed naves praebuisse non lego, maiori, ut colligere est, immunitatis argumento, quod Pisanos tamen et Genuenses fecisse constat, cum urbes in continente addictius regerentur. Post Henrici tempora, maxime post annum MCCCXXC, victis ad Fossam Clodiam Genuensibus, et classe eorum viribusque deletis, potentia navalis, et opes Urbis auctae, contra vicinorum in continente robur infractum, aut

aut aemulatione distractum, et exinde *fodrum regale et consuetum* exigi desitum, nunquam tamen, nec Lucelburgicis regnantibus, urbi remissum et cessum, multo minus a Ruperto horum successore alienatum, cuius adversam apud Insu-bres fortunam subsecuta quidem est insignis rerum commu-ratio, et Galeacios extrulit, Venetosque, parafacto iam in Lom-bardiam aditu, ad proferendos fines erexit. *Mussaeus lib. II. de gestis Italicorum post Henricum VII.* Quae tamen eiusmodi videntur esse, ut urbem ab antiquo Italiae regno non prorsus excludant, sed eam in conditione praestandi *fodri et consueti* relinquant, et in acqvirendo iure bonam fidem, in agnoscendo veritatem exposcant. Diuturna Caesarum absentia nullam Caesaris Imperii cessionem indicat, nec pristinum dominum mutat, quamvis hac occasione *novos Italia Principes, Gonzagas et Atefinos sortita sit, auctore Sabellico dec.ad. II. lib. I.* Non tamen ideo positi sunt extra fines regni, aut constituti extra ius Imperii, imo ne veri quidem ac legitimi habiti ante concessionem et confirmationem Caesaris, quod de Francisco Sfortia constat, quem de ea causa *tyrannum et novum hominem* nominavit Fridericus III. (aliis IV.) Imperator. Agnovit deinde possessionis vitium, et affirmavit, *terram Lombardiae Caesaris nomine se tenere, apud Aeneam Sylvium in historia Friderici III.* Eidem Imperatori fidem obstrinxit Borfius, et impetrato Mutinae Regiique du-cis titulo, obsequium devinxit, quod *Aeneas Senensis testatur.* Haec et alia iuris Caesaris argumenta Urbem admo-nent, ut maiestatem Caesaris minime negligat, maxime ob tractus et oppida continentis, quorum nomine id fieri par est, ne in mala fide, quae labem possessioni affert, constitua-tur. Nam quae magistratibus et non dominis, aut dominis fiduciaria lege summae potestati devinctis erepta possidentur, neque ullo voluntatis signo cessa intelliguntur, neque incon-

sulto, nec refragante summo principe cedi alienarive possunt, haec omnia eius generis sunt, ut possidentis animo religionem iniiciant, conscientiamque usurpantis dubiam reddant, et transferendi adeo domini facultatem non concedant. Sigismundus nihil praeter Patavii, Brixiae et Bergami *vicarium* assignavit: Fridericus III. Romam profecturus, urbem transiit, et omni officio cultus est, cui Dux Franciscus Fuscarius *devotam populi mentem* commendatam esse voluit, *quod sigillatim annotavit historicus Senensis, in vita Friderici Imp. p. 97.* Iustinianus Urbis legatus Maximiliano Caesari, ut imminens Caesaris bellum averteret, senatus de restitutione sententiam aperuit, et promotos a continentis ora fines ad Imperii, ducatusque Austriae detrimentum pertinere, haudquaquam dissimulavit, et urbem omnium, quae in continenti possideat, iuri renunciaturam, publicae voluntatis interpretis dixit. *lib. VIII. hist. Franc. Guicciardini.* Veritatem rei gestae firmat *Ludovicus Tübero*, et scriptori Florentino, cuius fidem multi suspectam habent, permagnum pondus affert, ingenue scribens, *voluisse omnibus Italiae urbibus, totoque continenti cedere, et insuper quingvagina millia numum, quae in singulos annos penderent, promississe: de temporibus suis lib. IX. p. 245.* Neque enim urbes illae religione obsequii se exolvere potuerunt; Caesares autem eo minus pristinum in eas ius amiserunt, quod Vicariis et fiduciariis dominis *Ludovico Deccio, Scalani, Sfortiis*, et obligatis sacramento clientibus ademptae sunt, salvis tamen rationibus Caesarum, quippe summorum et *naturalium* Italiae dominorum, qui omnem alienandi suspicionem evitarunt, et a cessione iuris Caesarei constanter abhorruerunt, nec modo retinendi, sed etiam, si quaedam crepta essent, repetendi voluntatem signis bene multis declararunt. Haud dubitandum est, quin reverentia eorum, qui ita possident, animos subeat, ut Caesa-



fares, nondum remisso in mediterraneas urbes nexu, fide et officiis colant, et proferendorum finium ergo nihil turbent, memores illorum temporum, quibus fines non ultra insulas et stagna urbis patebant.

XXII. Extant publicae Imperatorum tabulae, et clientelarum regni Italici indices, quibus nomina urbium fide et obsequio Imperatoribus devinctarum continentur. At in novissima *Gerzveileri* designatione plures clientelae et urbes, quae ad imperium ac regnum Italiae pertinent, omisae sunt, vel quia superiori statu mutato, erant in ditione principum, vel quia privilegiis et immunitate munerum, quibus tunc perquirendis non suppetebat otium, se tueri cupiebant: vel quia ob inopiam et difficultates numarias, salva in eas summa imperii iurisdictione, ad tempus negligebantur: Caesari nihilominus se audientes esse confirmabant, summamque eius auctoritatem agnoscebant: reliquarum nomine principes et respublicae Caesari, tanquam summo capiti tenebantur. Sigillatim tractus ducatusque *Lombardiae*, est provincia utique nobilis, et pars Romani Imperii preciosa, in rescripto *Friderici II.* apud *Goldastum* s. II. p. 51. Quae de causa *Mediolanum Imperatoris et Imperii patrimonium dicitur*, R. I. 1542. §. 3. *Qvin et Finarium, Marebionatus* honore praeditum, est verum regni Italici membrum, sententia *Caroli V.* post longam litis concertationem, victis iudicio, quos *Iacobus Menochius* defendit, Liguribus, confirmatum. Ducatum hunc *Ludovicus Boioarus*, sublato *Viccomitum* principatu, in ditionem redegit, veterumque Imperatorum exempla securus, provinciam fecit, teste *Mussato in Ludovico Bav.* Sed postea cum *Viccomitibus* in gratiam rediit, et Azonem cum Vicarii potestate constitutum, liberaliterque habitum, maioribus quoque beneficiis ornavit. *Ripamontius* dec. III. l. 2. p. 145. *Luzelburgici* etiam cumulata liberalitate

noti, summa nihilominus *Lombardiae* iura seruarunt, nec regni eius, cui dictus principatus subest, curam abiecerunt. Docet hoc firmatque liber, *Notitia status Etruriae*, inscriptus, et imperante Carolo IV. confectus, quo fidelium Caesarique obsequentium civitatum et castrorum nomina posteritatis memoriae traduntur, et perfidiae simul ac perduellionis reae, urbes, iure Imperatorum Regumque integro, designantur. De *Senis*, et pluribus Tusciae locis regno Italiae comprehensis, sive per se Dux Mediolanensis possideat, sive aliis titulo fiduciario concedat, imperio devincitur. *Apulia* ut se habeat, supra attigi, cuius repetendae causa Henricus VII. et hoc mortuo, Ludovicus Boioarus, armis experiri voluerunt. De altero testes protuli, de altero tradit Albertus Argentinensis. *Ludovicus* (IV. Imp.) *terram Roberti Regis, scilicet Apuliam, ingredi intendebat. Robertus quoque collectis omnibus terram illam relinquere, se Caesar accelerasset, et in provinciam intenderat se transferre. Chron. p. 124. Albertinus Mussatus in Ludovico Bav. p. 6.* Huius, quod apparavit, belli causa non aliunde sumpta est, quam a violata imperantis auctoritate sanctissima, et utique a spreta *sacrosancti* Imperii summa, qua ad Apuliam pertinet, iurisdictione. De eiecto ex Apulia Rogerio, et iure per Lotharium II. vindicato, legendus est *Otto Frisingensis Chron. l. VII. c. 20.*

XXIII. Taurinorum principatus ad Italiam spectat, quem veteres Langobardi, *ducatus* titulo, in ditione sua habuerunt, inter quos non piget huc referre Agilulfum, et Gribaldum Taurinorum duces, quorum meminit *Paulus Diaconus de gestis Longobard. d. l. III. c. 30. et l. IV. c. 53. ex eo Leander Albertus in descriptione Italiae, speciatim in Taurinis.* Franci deinde et Saxones per magistratus et vicarios huius ditionis populum rexerunt, et Taurinorum urbi praefectos imposuerunt, quod de Henrico VII. tradit *Mussatus in vita eiusdem l. I.*

p.3. Illi Caesarum, pro quibus curabant, beneficio Comites facti, et *Marchiones* dicti sunt, quod custodirent claustra Alpium, quibus Italia aditur. Ita coepit et institutus est *Pedemontis* principatus, extra Sabaudiae fines in Gallia subalpina, et in ipsa adeo Italia Langobardica, cuius partem cis et trans Padum complectitur, acquisitus. Aptè distingvit Mussatus, et indicat tractus in duo regna descriptos, ac diverso iure et ditio-  
ne comprehensos. *Ameus* (Amedaeus Comes huius nominis IV. qui Henricum VII. Alpes transeuntem comitatus est) *Comes Sabaudiae* (in regno Arelatenſi Germanicae ditionis) *provinciae Longobardiae* (in regno Italiae) *Comes, de gestis Henrici VII. l. IV. p. 22.* Vterque comitatus in principatum versus est, quorum alter *ducatus* titulo in tractu Allobrogum et Sabaudia, alter apud in alpinos, quorum caput Augusta Taurinorum est, constitutus, coniunctam habet dignitatem *Vicarii* per Italiam generalis, Thomae Allobrogum regulo, *Pedemontis* Comitatum adepti, Friderici II. auspicio concessam, sed primum à Sigismundo cum novo ducis Sabaudiae titulo, Amadaeo VIII. attributam, et perpetuo habendi iure confirmatam, quae post varias superiorum temporum vicissitudines, ancipitemque Caroli Emmanuel II. fidem, summi auctoritate Principis adempta et reddita, atque Caesaræae pactionis formulam relata, propterea quod eam Duci postliminio restituendam *Electores* ab eligendo Imperatore stipulati sunt, in *Capitul. Leopold. §. 4. et novissima Capit. Iosephi Regis Roman. §. 4.* adiecta, quae fidem ducis obligat, clausula, ut Caesaræis mandatis, inhibendi et advocandi causa editis, morem gerat, quamquam Caesar nihilominus in hodierno Duce Victore Amadaeo II. constantiam foedere et fideli officio dignam merito requirit. Is ceteroquin in Gallia subalpina *Dux* est propter *Salassios*, Italiae transpadanae populos, ubi *Augusta Praetoria*, praecipua urbium, et caput gentis. *Marchionatus Italiae Vicariatus* muneri percommis-

dus,

dus, atque ob situm loci, transitusque opportunitatem huius  
 familiae Ducibus concessus et collatus, manifestum est Caesa-  
 rei iuris documentum. Mons Ferratus, Italiae Cispadanae,  
 principatus, sententia Caroli V. Imp. Carolo III. Allobrogum  
 duci abiudicatus est, sed litem iudicio Caesaris sopitam, et de-  
 nuo excitatam, pactio Ratisbonae, et Claraevi inita finiit, ac no-  
 vissime pax Vespthalica firmavit. *P. Bizarus, Ant. Possevinus,*  
*Ripamontius, Instr. pac. Monaster. §. Item ne controversiae, Ca-*  
*pitul. Leopoldi, et Iosephi §. cis.* Omnia huius Ducis iura, benefi-  
 cicio Caesarum constant, et possessiones quaedam, nexu benefi-  
 ciario solutae, continentur imperio Caesaris, quod remisso  
 clientelae vinculo, adhuc iure summae potestatis manet.

XXIV. Mantuae ducatus beneficio et fide Caesari obli-  
 gatus est; *Marchionatum* Sigismundus instituit, quem alii ad  
 ultima Ottonis M. tempora reiciunt, nulla veterum auctorita-  
 te, indiciiis etiam contrariis, quae vitium *Ottoniani diplomatis*  
 produnt. Antea enim in ea urbe comites et vicarii Caesarum  
*potestatis* titulo curarunt, et probato Caesaribus obsequio, po-  
 tentiam simul et dignitatem auxerunt, cumque illi principum  
 Italiae lites dirimerent, causa cognita, plerumque Gonzagae  
 duces vicerunt, et fide non suspecta, officiisque sinceris sum-  
 mos augusti nominis Principes sibi devinxerunt. Sed Caro-  
 lus Gonzaga Nivernius, cum Ferdinandi II. auctoritatem ne-  
 gligeret, legibus et armis ad obsequium redactus, Caesari sa-  
 cramento fidem obstrinxit, ab eoque tempore Vincentio II.  
 agnato legitime successit. Hodiernus Dux Carolus IV. in-  
 consulto beneficii domino, Urbem Casalensem externo regi  
 vendidit, atque ab officio fiduciarii Principis discessit, quam  
 Caesar superiore anno suis foederatorumque armis recepit,  
 adituque Padi firmato, quietem Italiae et pacem denuo stabili-  
 vit. *De rebus Mantuanis legendi Iulianus Gosellinus, Antonius*  
*Possevinus, Baptista Saecbus, incumque P. Lambecius, de bello*

*Mant-*



*Mantuanus Vassebergius, aliique.* Eandem obsequii gloriam Caesari debet *Gardisallum*, ducatus honore praeditum, iure et ditione cum ducatu Mantuae denuo coniunctum, *Grastalla* hodie nominatur. Novellaria, Italis *Novellars*, cum principatu huius nominis, perinde ac Mantuanus, cum quo necessitudinem habet, legibus imperii tenetur. Quorsum spectant *Bozolum et Castellio Sciverorum*, vulgo *Bozzolo, et Castiglione*.

XXV. Mutina ab initio regni Langobardici maiestatem Imperatoris coluit, et mutato Vicariorum regimine, duces accepit, praemiumque fidei aeqve ac *Regium* tulit. Primus Dux Murinae et Regii constitutus est Borlius, Marchio Atestinus, a Friderico III. illac transeunte, ad novam dignitatem evectus. *Aeneas Sylvius in vita Friderici p. 94. Io. Baptista Pigna bist. d. VII.* Legitima Borlii soboles defecit in Alfonso II. et uterque adeo ducatus ad Imperatorem iure *caduci* pervenit, sed Rudolphus II. successionem impertitus est *Caesari Atestino*, Alfonso nothi filio, sub lege fidelis obsequii, quod Imperatori et Regi Italiae deberetur. Contra fecit nuper Franciscus I. et spreto Ferdinandi III. auctoritate, milites ad oppugnandos Insubres in aciem eduxit, ducatumque finitimum externo transalpini Regis auxilio nixus vastavit. Idcirco Ferdinandus pro constituenda Italiae pace annitens, remedium ei malo paravit, et ni ab armis desisteret, poena amissionis beneficiorum, et proscriptionis publicae denunciata, exemplum Henrici VII. secutus, a proposito retraxit Ducem. *V. post Aeneam, Guicciardinum, Pignam, Alf. Lescbi, et auctor de iustitia armorum Imp. contra Mutinae Regiique Ducem, et discussio quærelarum, pro defensione Imperatoris scripta.*

XXVI. Etruriae Ducatus consilio et opibus Mediceis fundatus, et auspicio beneficioque Caroli V. constitutus, annitente inprimis Clemente VII. ut gentis suae potentiam in per-

vetusta et splendida Etruscorum urbe confirmaret. Respondit huius consilio eventus, et *Florentiae*, armis ad obsequium redactae, pro summo Caesaris in urbem imperio Alexander Medicus, Laurentii filius, dux impolitus, eoque caeso Cosmus, principatum urbis volente etiam populo adeptus, *Senarum* urbem, in fundo imperii sitam, adiecit, ea lege, ut Regis Hispaniae beneficio urbem et agrum possideret deinceps et agnosceret; Rex autem eo nomine Imperio, nemine interiecto, beneficiarius maneret. Clientela ergo Senensis est *subfeudi* iure constituta, et cum imperio, ad quod pertinet, et a quo Hispanus suscipit, etiamnum coniuncta. Igitur decreto Pii V. intercessum est, quo hic Cosmum Etruriae Regem appellare voluit, obnitente Maximiliano II. auctoritatis suae, et Imperii causa, quod unus ille Imperator Augustus, et Rex Italiae esset, neque alius in Italia *imperiali et regia* principes creare, aut principibus ius dicere, et tribuere dignitates principales posset. Res tandem eo deducta est, ut Cosmus in magni Ducis titulo acquiesceret, et Etruria, quae nunquam duces, aliquando Marchiones sub Regum potestate habuit, in conditione et fortuna magni ducatus permaneret. Nihilo magis *Pisanac* urbis iuri renunciatum est, quae Imperatores omni honore cultuque affecit, etiam Ludovicum IV. acerrimum iuris Caesarei vindicant, ut est apud Mussatum. *Pisas*, inquit, *ubi Ludovici obedientia, et fides imperii servabantur, in Ludov. Bav. p. 5.* Nec vero Austrii, urbem agrumque Pisanum a regno Italiae abstraxerunt, neque summam eius potestatem in Mediceos transfulerunt, nec per leges Imperii transferre potuerunt, quippe quas ipsimet Austrii possessoribus malae fidei saepe obiecerunt. Facessant igitur et valeant nugigeruli isti, qui Tusciae Liguriaequae urbes a Rudolpho I. venditas, et Italiam fere reliquam a Luzelburgicis venundatam atque abalienatam, audaci, et animadversione digna licentia scribunt. Ex Thuano gravi, et rerum perito  
seri-

scriptore liquet, Cosmum pro fiduciario Imperii principe habitum semper et agnitum, eiusque filium et successorem Franciscum, in paterna dignitate, et magno Etruriae ducatu a Maximiliano II. Caesare confirmatum, quod nemo sit, quin existimet, a summo directoque Caesaris dominio proficisci. *Hisfor. lib. LIV. et LX.* Nihil addo de oppidis, et *dominiis* minoribus aliis, quae magnus Dux proxime, aut remote beneficio Imperii agnoscit. Similiter atque se res habet cum *Itra*, maris Tyrreni insula, cuius partem, et nominatim oppidum portumque Ferrarium eodem iure, sed interveniente beneficiario propiore, tenet, atque huius domini ratione *subvasallus* Imperii constituitur, et usu tribunalium vocatur.

XXVII. Parma et Placentia in solo Langobardico sitae, et diu in ducatum Langobardici nominis conflatae, at postea velut soluta compage separatae sunt, atque ad ditionem Pontificiam traductae, neque sic tamen prorsus a iure Imperii exemptae. Urbium harum ea quondam conditio fuit, ut a vicariis et potestatibus, quemadmodum aliae regni Italici urbes, regerentur, eaque de causa inter Langobardicas, et Caesarum nomine imperioque constitutas referrentur. Parmenses Ludovico IV. Imp. fideles extitisse, narrat *Mussatus in eo, p. 8.* Placentiam Mediolano adiectam, res Maphaei *Viccomitis* confirmant, quam iure huius ducatus repetiit, ac reddi postulavit Carolus V. *quod ex Gvicciardino et Thvano constat.* Praeter duos hos ducatus alias clientelas, et sine dubitatione Imperio devinctas habent, quas Imperatorum concessu accipiunt, et conservant. Omitto reliquos, et minores Italiae Principes, Imperatorum auctoritate beneficioque constitutos, et fide ac sacramento religione Imperatoribus devinctos, aut remote saltem, interiecto propiore aliquo principe, clientelae vinculo illigatos, omnes tamen arctissima officiorum necessitudine capiti suo coniunctos, et uno, quod neminem excipit, Imperio com-

prehenſos. Quo loco numeroque ſunt cuncti duces et principes, quos univerſa quidem Langobardia habet, quos Gallia Ciſalpina et ſubalpina citra atque ultra Padum includit, quos Liguria et Etruria, non excluſis Genua et Luca urbibus, continet, quos denique omnes regni Veteris Italici reliquiae trans Apenninum complectuntur. Magnum ergo decus, noſtra memoria, ad Germaniam acceſſit, quod LEOPOLDVS, inſtaurata per Italiam auctoritate, et recepto ad Padum caſtro *Casaleſi*, regnum illud in obſeqvio confirmatum, ab externo dominio liberavit, ac iure ſuo regio, quod in Italia obtinet, uſus eſt, et collationes belli Italici cauſa imperavit, *Xenia* antiquo, necdum antiquato Imperatorum iure exegit, lites Principum Italiae diremit, negotia ſucceſſionis; tutelae, legibus compoſuit, regionum et finium controverſias deciderit, deque omnibus ad *regalia* pertinentibus more maiorum cognovit et iudicavit, ac munere tam iuſto, quam omnibus Auguſtis glorioſo perfunctus, non modo nullum *dereliſti* ſignum, ſed nullam quoque *derelinquendi* ſuſpicionem praeſtavit, conſtituto per Italiam *ſiſci Imperialis Advocato*, ac demandatis Comitum Mediobarbo partibus, quos pro fide ſua, et dignitate, publica ſuſtineret, regniſque Italici clientelas, et partes earum atque acceſſiones, ex ſuperiorum temporum caligine in lucem revocaret, perquireret, et ſummo Italiae iudici denuntiaret: cuius rei, vindicatiſque Caefarei ultra Alpes et Apenninum iuris, monumentum Auguſto vindici aeternum apud poſteros extabit, et omnes quotquot futuri ſunt, ſucceſſores admonebit, AVGVSTOS non minuere Imperium, ſed augere, id quod ante Leopoldum dixit, et ſimili exemplo comprobavit Fridericus IV. ex Auguſta.

Auſtriorum gente Imperator.